



## **Messadi per la radunanza communal digls 15 da settember 2017**

Stimadas votantas, stimos votants

Suandontamaintg az infurmainsa dallas tractandas, tgi vignan discutadas e deliberadas a caschung dalla radunanza communal digls 15 da settember 2017.

### **Protocol dalla radunanza communal digls 12 da fanadour 2017**

Digl protocol dalla radunanza communal digls 12 da fanadour 2017 ins ò savia piglier invista u tg'el ò savia neir retratg davent digls 28 da zarcladour durant 30 deis an canzleia communal. Resalvond tgi aintran nignas protestas anfignen igls 26 d'avost 2017, vign igl protocol declaro scu approvo e sottascretg digl mastral e digl protocollist.

### **Lescha davart igl tractamaind d'ava persa digl cumejn Albula/Alvra**

A caschung dalla radunanza communal digls 12 da fanadour 2017 on votantas e votants approvo cun gronda maioritad la proposta davart igl proceder da spustar la lescha davart igl tractamaint d'ava persa sen la proxima radunanza communal.

Chella lescha vala per igl antier intschess communal. Ella regla, sa basond sen la lescha da biagier ed igl plan general d'avertura, la concepziun, l'utilisaziun, igl mantignamaint, la renovaziun e la finanzaziun da stabilimaints per avas persas, scu er la relaziun tranter igl cumejn e possessouras e possessours da taragn. Igl cumejn pretenda per saveir curveir igls costs da construcziun, digl travagl e dalla renovaziun da stabilimaints per avas persas, taxas adattadas agl caschunader tgi corvan igls costs. Per tot igl taragn tgi è colliia agls indrezs publics dalla dismessa dallas avas persas è da paer ena taxa da basa tgi sa repeta mintg'onn. La taxa tenor quantidad tgi è da paer per tot igl schaschant colliia, vign pretendaida periodicamaintg digl cumejn tenor igl adiever d'ava sopra tenor dumbrader d'ava e dalla taxa fixada ainten l'agiunta a chella lescha, an francs pro cubicmeter. La taxa da basa duess curveir ca. 50% anfignen 75%, la taxa da quantidad ca. 50 anfignen 25% digls costs da menaschi digl tractamaint dallas avas persas.

La suprastanza communal relascha en reglamaint per la realisaziun da chel reglamaint. La lescha preschainta sottastat agl referendum facultativ. La suprastanza communal definescha igl termin d'antrada an vigour da chella lescha.

## **Lescha davart igl urden da sepultura e da santieri digl cumegn Albula/Alvra**

Chella lescha regla igl urden da sepultura e da santieri sen igl territori digl cumegn Albula/Alvra. La suprastanza communal relascha en reglamaint per la realisaziun da chesta lescha. Las determinaziuns specificas per igls singuls santieris, vignan regladas ainten en'aggiunta. Ellas on la precedenza sen las determinaziuns digl reglamaint. Digl reglamaint davart la lescha digl urden da sepultura e da santieri e dall'aggiunta a chel reglamaint, pò neir piglia invista sen la homepage digl cumegn Albula/Alvra u tg'el pò neir retratg an canzleia communal a Casti. Las suprastanzas digls cumegns-baselgia Albula e Brienz/Brinzauls èn nias anvidos ordavant da piglier invista, resp. da piglier posiziun an tgossa. La lescha preschainta sottastat agl referendum facultativ. La suprastanza communal definescha igl termin d'antrada an vigour da chella lescha.

## **Casti: Veia Gelgia – sanaziun conducts d'ovra**

Cun l'elaboraziun digl GEP è nia constatto, tgi la drenascha dalla Veia Gelgia, agl nord digl territori d'abitadi Arniev, corresponda betg ple allas preteisas d'ena drenascha moderna. Igl spazi d'abitar Rand ed Arniev vignan transversos dalla Veia Gelgia. Aint igl trasse dalla veia cantunala ègl perche gl er lengias tgi servan all'equipaziun da zonas d'abitar. An connex cun la sanaziun dalla Veia Gelgia planisada digl cantun, è er neida examinada la situaziun digls indrezs communalis. La dirada da veta da chels indrezs è contanscheida gio dadei. Igl onns passos ins ò gia da cuntschier adegna puspe la lengia dall'ava. Pinavant è nia mess ord funcziun ena part, uscheia tgi or dalla lengia viglia an furma da rentg èn daventadas dus lengias gistas. Igl costs approximativs per la sanaziun digls indrezs communalis (povedimaint d'ava e lengias da dismessa d'ava) montan a radond 275 000.- fr. La suprastanza communal propona da deliberar en credit da 275 000.- fr. per la sanaziun digls conducts d'ovra.

## **Casti: renovaziun/amplificaziun dalla staziun da trafo vischnanca**

A Casti è la staziun da transformator vischnanca an funcziun scu staziun da tor. Agl partera sa catta igl transformator da 630 kVA betg siero sch'ins vign a contact. Segl plang soura èn igls indrezs da tensiun masanga (indrez MS) scu er en distributour da tensiun bassa betg siero sch'ins vign an contact (distributour NS). Igl indrez da tensiun masanga ò da curt subia en donn irreparabel. Per chest muteiv stò igl indrez da tensiun masanga da treis pennas neir ramplazzo. Cun igl diever d'en indrez da tensiun masanga da quatter pennas so igl transformator vischnanca neir spisginto aint igl futur da dus varts. Igl distributour da tensiun bassa betg siero sch'ins vign an contact, duess er neir ramplazzo antras en distributour pi grond. Perveia dalla mancanza da plaz ègl indispensabel da metter ena part digl indrez ainten en'annexa dasperas, tgi vign biageida da nov (li deposit da gera). Ainten chell'annexa duess neir igl nov transformator da 630 kVA cun ena bitschida dad ieli integrada. Igl costs pigl ramplazzamaint digl transformator vischnanca montan a radond 265 000.- fr. La suprastanza propona da deliberar en credit da 265 000.- fr. per la renovaziun/amplificaziun digl transformator vischnanca.